

**Mbete kí njèkungì mutə kí  
Ja  
ndàngì  
Ta-je kí do Mbete-tì kí  
njèkungì mutə kí Ja ndàngì**

Njèkɔwkułə Ja ndàngì mbete kin kdo kulə-né dingəm mee dingəm-tì kí ri-é lə Gayusi. Mbete kinlé, ɛ ya to mbete kí goji itə mbete-je lay kí mee Mbete-tì lə Lubə. Mee mbete-tì kí nè Kinlé Ja pa ta kí sobi do ta kí togro-tì kè ndigna titi kí ɛ pa-né mee mbete-je-tì kí joo lé to. Mee mbete-tì kí nè kinlé Ja pa ta ɔsi-né kagi do njéndó dow-je né-je-tì kí ngom al, ngà ɛ pa ta ɔsi-né kagi do dow-tì kí panjiyə maji al. Lo tum gin ndàngì mbete-tì lé, njèndàngì-é toji rɔ-é kí «'ngatógi.» Dow kí káre kin ya ndàngì mbete Poyta kí Maji kí ri Ja tò do-tì bá ɛ ndàngì mbete lə Ja kí 1, 2, 3 rəm, ndàngì mbete Né-je kí 'teɟ do-é ('Ndó ta-je kí do mbete-tì kí doɔy kí Ja ndàngì). Ja tum gin toji rənəl liə kdo Gayusi kí isi mee néra-tì kí togro-tì. ɛ pa ta do ndigi-tì kí tò mee Gayusi-tì kí ɛ toji loki uwə-né mba-je kí njékow kilə mbe Poyta kí Maji lə Kristi kí rɔ-é-ti. Ngà Diotrepi, dingəm káre kí dan njékəwnə-je-tì kí Gayusi isi ɔr nɔ-dé rəmə, ɛ ra bin al. ɛ mbatì kuwə ngannjékullə-je lə Kristi rɔ-é-ti rəm, bá ɔgi dow-je kí rangi kadi d'uwə-dé kí rɔ-dé-ti rəm, ɛ ɔsi ta Ja rəm to. Go ta-ti kí Ja pa do kullə ra Diotrepi-tì kí maji al lé, ɛ pa ta do

kullə ra Démétriyusi-ti kí maji tɔ. Ta kí Ja idə Gayusi lé, ɛ idə-é kadi ndaji panjiyə kí majal kin al, ngà kadi ndaji panjiyə kí maji ('Ndó 11).

*Tɔji rɔ kɪ lapiya kí ra*

<sup>1</sup> †Ma 'ngatɔgi m'ndangi mbete kin m'adi-i i Gayusi kí m'ində-i dan kəm-m-ti mee ta-ti kí tɔgrɔ-ti.

<sup>2</sup> Ngonkɔ-m kí m'ində-i dan kəm-m-ti, m'ndigi kadi ɔw kí kete-kete mee né-je-ti lay ə kadi rɔ-i tɔ kɪ lapiya titi kí ndil-i tɔ-né kɪ lapiya kare kin bè tɔ.

*Kullə ra kí njururu lə Gayusi*

*Mat 10:40-42*

<sup>3</sup> Loki ngankɔ-ji-je kí njékadmeɛ d'i nu 'ree, 'pa ta lə ta kí tɔgrɔ-ti kí tɔ mee-i-ti rəm, fá njiyə kí i njiyə mee-é-ti rəm kinlé, rɔ-m nəl-m nɔ.

<sup>4</sup> Rənəl lə-m kí nɔ lé, to koo kí m'oo 'panə ngan-m-je 'njiyə mee ta-ti kí tɔgrɔ-ti.

<sup>5</sup> I kí m'ində-i dan kəm-m-ti, i to njera né kɪ kadmee adi ngankɔ-ji-je kí njékadmeɛ kí 'to mba-je kàrè, i 'ra sə-dé maji.

<sup>6</sup> Ta lə ndigi kí i 'ndigi dow-je lé, de 'pa ta-é rəsi nɔ njékəwnɔ-je-ti. Kow mba lə-dé kàrè maji kadi i 'ra sə-dé dɔ-ti asi gangi-é-ti kí à nəl Lubə rəm tɔ.

<sup>7</sup> Kdɔ de d'ɔw kdɔ ta kí sobi dɔ 'Babe ə 'taa né ji njékadmeɛ al-je-ti al.

<sup>8</sup> Adi dow-je kí bè kinlé fá tɔ kadi j'uwəi-dé ki rɔ-ji-ti, kdɔ kadi j'toi njera sə-dé kullə nati sobi dɔ ta kí tɔgrɔ-ti.

---

† 1:1 1:1 Knj 19:29; Rəm 16:23; 1Kɔ 1:14

*Kullə ra kí majal lə Diotrepì kì kullə ra kí njururu lə Démétriyusi*

*1Kɔ 4:18-21*

<sup>9</sup> M'ndàngi mbete sɛ m'adi njékəwnə-je; ngà Diotrepì kí ɓo to kí 'boy ngay dan-dé-ti ra-é kinlé uwə-ji kì rɔ-é-ti al.

<sup>10</sup> Bɛɓa loki m'a tɛɛ rɔ-si-ti nɔɔ rəmə, m'a pa ta rəsi dɔ kullə ra-é-je-ti. Ɛ lé pa ta-je kí maji al maji al dɔ-ji-ti; kin kàrè usi rɔ-é-ti al adi ngankɔ-ji-je kí njékadmɛɛ kí d'ow kàrè ɛ mbati kuwə-dé kì rɔ-é-ti rəm, ɓá ngankɔ-ji-je kí ndigi kuwə-dé kì rɔ-dé-ti kàrè ɔgi-dé rəm, ɓá tubə-dé dan njékəwnə-je-ti rəm.

<sup>11</sup> I kí m'ində-i dan kəm-m-ti, 'ndaji né ra kí maji al al, ngà né ra kí maji ɓá 'ndaji. Dow kí njèra né kí maji lé to dow lə Lubə, ngà dow kí njèra né kí maji al lé, gə Lubə al.

<sup>12</sup> Dow-je lay ya 'pa ta kí maji dɔ Démétriyusi-ti, ə ta kí tɔgrɔ-ti\* kí ta-é-ti kàrè tɔji kí ɛ to dow kí maji tɔ, ɓá jɛ kàrè j'pa ta kí maji dɔ-é-ti ə i kàrè 'gə kí ta lə-ji to ta kí tɔgrɔ-ti.

<sup>13</sup> Né-je n̄a tò kadi m'ndàngi ta-é mbete-ti m'adi-i ya, ngà m'ndigi ndàngi mɛɛ mbete-ti al.

<sup>14</sup> M'ində mɛɛ-m-ti kí m'a kow rɔ-i-ti mɛɛ ndɔ-je-ti kí à ree kin ə j'a pa-n̄a ta kì ta-ji j̄a-j̄a.

<sup>15</sup> Kadi lapiya n̄ay sə-i! Nam-i-je 'ra-i lapiya ə i kàrè 'ra lapiya nam-ji-je kàre-kàre lay adi-ji tɔ.

---

\* **1:12 1:12** Mɛɛ mbete-ti kí 'ndàngi kí ta grɛki lé 'panè to ta kí tɔgrɔ-ti ɓá pa ta kí maji dɔ Démétriyusi-ti.

**Mango**  
**Mango: Ta lə Lubə Kunmindi kí Sigi (New**  
**Testament)**

copyright © 2018 Wycliffe Bible Translators, Inc.

Language: Mango

Contributor: Wycliffe Bible Translators, Inc.

All rights reserved.

2025-05-13

---

PDF generated using Haiola and XeLaTeX on 13 May 2025 from source  
files dated 13 May 2025

96bdbd07-24d6-556c-9e7c-7269c72880cd